

輿地廣記卷第三十二

利州路

次府興元府春秋屬蜀戰國屬楚秦惠王立漢中郡二漢因之高帝始封漢王都此建安中爲張魯所據改曰漢寧曹公克魯復曰漢中蜀劉備破魏將夏侯妙才遂有其地以爲重鎮漢中常以巴蜀扞蔽故劉備初得漢中曰曹公雖來無能爲也是以巴蜀有難漢中輒沒自公孫述劉備李雄譙縱據蜀漢中皆爲所陷魏末平蜀兼立梁州晉宋齊梁皆因之西魏亦立梁州及立漢中郡後周末改郡曰漢川隋開皇初郡廢大業初州廢復置漢川郡唐武德元年曰梁州開元十三年改曰褒州二十年復故名天寶元年曰漢中郡後升山南西道節度興元元年德宗巡幸升爲興元府 皇朝因之今縣四

次赤南鄭縣故褒之附庸周時鄭桓公死於犬戎其民南奔居

地三十二

利州路

一宋刻重修本補

此因曰南鄭顯王之世蜀有其地至六國楚人兼之懷王衰弱秦略取焉自秦以來皆爲漢中郡治項羽封漢高帝爲漢王蕭何曰天漢美名也遂都南鄭大城周四十二里內有小城南憑北結環雉金墉漆井皆漢所修築地沃而川嶮曹公旣克張魯方之雞肋謂得之無可用而棄之爲可惜也蜀先主以魏延後主以蔣琬姜維相繼守之魏末平蜀兼立梁州晉以後皆因之齊建武二年蕭懿爲刺史魏將元英率兵十萬通斜谷圍南鄭懿拒守百餘日不拔而退梁天監三年刺史夏侯道遷以地入魏大同元年魏刺史元羅復以地入梁承聖二年尉遲迴平蜀乃入西魏焉後周末改郡曰漢川隋唐因之後爲興元府朱梁時王建得其地後唐克之又爲孟知祥所有周顯德中節度使張虔釗以地歸附有玉女山黃牛山中梁山仙臺山漢水有胡城漢張騫使匈奴與胡妻及

堂邑父俱還漢中築城以居也晉義熙十五年城上有密雲五色昭章及曉城崩半許淪漢出銅鐘十二枚以爲宋室之瑞

次畿城固縣二漢屬漢中郡蜀改爲樂城晉復故及宋齊梁西魏後周皆屬漢中隋屬漢川郡唐屬梁州武德二年改曰唐固正觀二年復故有通關山古曰通關勢山高百餘丈上有匈奴城方五里濬塹三重漢王北定三秦蕭何守漢中欲修此道以通關中故名爲通關勢有黑水出北山南流入漢諸葛亮牋云朝發南鄭暮宿黑水謂此有韓信臺卽漢高帝置壇設九賓之禮以拜信爲大將

次畿褒城縣故褒國周幽王后褒姒生於此漢元鳳六年置褒中縣及東漢晉皆屬漢中郡隋開皇初曰褒內屬梁州仁壽元年因失印更給改曰褒城義寧二年改曰褒中唐正觀三

地三十二

利州路

二 宋刻重修本補

年復曰褒城屬梁州漢陽平關在西北有石牛山山有小石門穿山通道六丈有餘昔秦欲伐蜀而不知道乃作五石牛以金置尾下言能糞金欲以遺蜀蜀王負力而貪令五丁開道引之秦因使張儀司馬錯以兵尋路滅蜀謂之石牛道東漢永平中司隸校尉犍爲楊厥又鑿而廣之蜀都賦所謂阻以石門是也有女郎山上有女郎冢女郎廟俗言張魯女所葬有褒水西北出衙嶺山東南逕大石門歷故棧道下谷蜀諸葛亮死於五丈原魏延先退而焚之卽此褒水又南逕三交城又東南逕丙水口又東南歷小石門又東南歷褒谷之南口又東南歷褒城縣東又南入於漢水

次畿西縣本沔陽縣地二漢晉宋皆屬漢中郡後省元魏置嶓冢縣後周因之隋大業初改爲西縣屬漢川郡唐武德三年置褒州八年州廢來屬有沔陽故城在西漢蕭何所築劉備

北定漢中卽漢王位於此有西樂故城在西南甚險固蜀諸葛亮所築晉梁州刺史楊亮守之爲苻堅所破後刺史姜守潘猛亦相仍居此城側有客裘溪水北流入漢今謂之洛水有定軍山在東南曹公克漢中命夏侯淵守之劉備自陽平關南渡沔水破斬淵於此諸葛亮將死遺令葬此山不起墳隴惟深松茂柏攢蔚川阜莫知墓所在山東地名高平有亮廟蜀步兵校尉習隆等所表立也有張魯城在西魯沛國張陵孫也行五斗米道劉焉以爲督義司馬住漢中因竊據焉有湑水北發武都氏中南逕城東又南逕張魯治東又南流入沔謂之湑口張魯治謂仙官所治也有白馬山舊有張天師堂今曰湑口化有百牢關在西南

都督府利州春秋戰國爲蜀地秦屬蜀郡二漢屬廣漢郡蜀先主分屬梓潼郡晉孝武帝分立晉壽郡宋齊因之後魏兼立益州世號小益州梁曰黎州西魏復曰益州又改曰利州隋開皇初郡廢大業初州廢爲義城郡唐武德元年曰利州天寶元年曰益昌郡王蜀知昭武軍節度後唐改郡曰益州 皇朝因之景祐四年改寧武軍今縣四

中縣谷縣故葭萌縣本蜀王弟葭萌所封爲苴侯邑史記所謂苴蜀相攻是也二漢屬廣漢郡劉備改曰漢壽屬梓潼郡晉太康元年改曰晉壽太元十五年立晉壽郡宋分置興安縣後復併焉而改晉壽曰興安後魏兼立益州西魏曰利州隋開皇十八年改興安曰縣谷唐因之有龍門山嘉陵江潛水縣谷

中葭萌縣漢舊縣地東晉安帝置晉安縣屬新巴郡宋齊因之元魏爲郡治焉隋開皇初郡廢十八年改晉安縣曰葭萌屬利州唐因之有嘉陵江

中下嘉川縣漢葭萌縣地宋置興樂縣及宋熙郡元魏改縣爲嘉川隋開皇初郡廢屬利州唐武德二年屬靜州正觀十七年州廢來屬故平蜀縣本義城西魏置隋屬利州義寧二年改曰義清唐武德七年置南平州正觀二年州廢來屬天寶元年改曰脣山 皇朝乾德三年改曰平蜀熙寧三年省入嘉川有石鷲山

下昭化縣漢葭萌縣地宋置益昌縣屬白水郡隋唐屬利州皇朝開寶五年改爲昭化白水鎮故白水縣地二漢屬廣漢郡晉屬梓潼郡孝武分屬晉壽郡別置平州縣宋曰平周後又曰平興置白水郡後改縣爲白水而改郡爲平興隋開皇初郡廢復改縣爲平興屬利州十八年又改爲景谷唐武德四年置沙州正觀元年州廢來屬寶厯元年省尋復置其後又省爲白水鎮

地三十二

利州路

四

宋刻重修本補

望洋州春秋戰國爲楚地秦屬漢中郡二漢晉宋齊梁皆因之元魏立洋州及洋川儻城二郡隋開皇初郡並廢大業初州廢屬漢川郡唐武德元年立洋州天寶元年曰洋川郡王蜀升武定軍節度 皇朝景祐四年改武康軍今縣三

望興道縣漢城固縣地蜀以爲重鎮後主延熙中將軍王平守興勢魏將曹爽攻圍不克卽此地也元魏置興勢縣及立儻城郡隋初郡廢屬洋州後州廢屬漢川郡唐初屬洋州貞觀二十三年更名興道天寶十五載州自西鄉徙治於此壻水鎮因仙人唐公房之壻所居得名有興勢山漢水壻水水北發聽山南流入漢有駱谷路南口曰儻谷北口曰駱谷通長安唐德宗僖宗幸興元皆出此

上西鄉縣漢城固縣地蜀置南鄉縣晉太康二年改曰西鄉及宋齊梁屬漢中郡元魏改縣曰豐寧立洋州及洋川郡隋初

郡廢屬洋州後州廢屬漢川郡唐初立洋州天寶十五載州徙治興道故洋源縣唐武德四年析西鄉置寶厯元年省故定遠城在南東漢班超封定遠侯卽此有雲亭山洋水水導源巴山東北流逕西鄉又東北流入漢漢戚夫人生於洋川高帝寵之名其川曰洋以表誕生之休洋也

中真符縣本華陽縣唐開元十八年析興道置天寶三載省八載開清水谷路復置因鑿山得玉冊改爲真符屬京兆府十一載來屬故黃金縣漢安陽縣地屬漢中郡有黃金谷因置黃金戍黃金戍張魯所築南接漢川北枕古道險固之極昔氏王楊難當令魏興太守薛健據黃金宋秦州刺史蕭思話使陰平太守蕭坦攻拔之卽此西魏置縣屬儻城郡隋屬漢川郡唐屬洋州 皇朝乾德四年省入真符有寒泉山黃金水

地三十二

利州路

五

宋刻重修本補

上閬州春秋戰國爲巴地秦二漢屬巴郡建安六年益州牧劉璋分立巴西郡晉宋齊因之梁立巴州及北巴郡西魏平蜀立隆州及盤龍郡後周因之隋開皇初郡廢大業初爲巴西郡唐武德元年爲隆州先天元年改爲閬州天寶元年曰閬中郡後唐升保德軍節度 皇朝乾德四年改安德軍屬利州路今縣七

望閬中縣二漢屬巴郡劉璋立巴西郡蜀將張飛守閬中爲其下張達范强所害晉因之梁立北巴州及北巴郡西魏立隆州及盤龍郡隋曰閬內縣唐曰閬中縣有閬中山仙穴山嘉陵江

緊蒼溪縣晉置屬巴西郡後省而置漢昌縣隋屬隆州開皇末復改爲蒼溪唐屬閬州有雲臺山東江蒼溪

緊南部縣漢充國縣地東漢初平四年分置南充國屬巴郡晉

宋齊屬巴西郡梁改曰南部屬北巴郡西魏置新安郡後周郡廢屬盤龍郡隋屬巴西郡唐屬閬州有九子山嘉陵江緊新井縣本南充西充二縣地唐武德元年析南郡晉安置屬隆州後屬閬州有西水

中奉國縣漢閬中縣地後分置奉國縣梁立白馬義陽二郡隋開皇初郡廢及省義陽縣入焉屬隆州唐武德七年屬西平州正觀元年來屬岐坪鎮故岐平縣隋屬利州唐開元二十三年屬閬州寶曆元年省天復中復置 皇朝乾德五年省入焉有天目山奉國水

中新政縣本漢南充安漢二縣地唐武德四年析南部相如置屬閬州有隆奔山嘉陵江

中下西水縣本漢西充縣地後分置西水梁立掌夫郡西魏改曰金遷郡隋開皇初郡廢屬隆州唐屬閬州晉安鎮本西充皇朝熙寧五年省入西水

上劔州春秋戰國爲蜀地秦屬蜀郡二漢屬廣漢郡蜀分屬梓潼郡晉宋齊因之梁立南梁州後改爲安州西魏改爲始州及立普安郡隋開皇初郡廢大業初州廢復普安郡唐武德元年曰始州先天元年改爲劔州天寶元年曰普安郡蜀王氏孟氏因之今縣六

中下普安縣漢梓潼縣地後置南安縣西魏改爲普安立普安郡隋初郡廢後復立唐初曰始州後曰劔州臨津鎮漢梓潼縣地南齊置胡原縣隋開皇七年改爲臨津屬始州唐屬劔州 皇朝熙寧五年省入普安有大劔山大劔水

上梓潼縣二漢屬廣漢郡建安末劉備嘉霍峻守葭萌之功乃

立梓潼郡以峻爲太守晉宋齊因之後改縣曰安壽西魏改郡曰潼川隋開皇初郡廢屬始州大業初復改縣曰梓潼唐屬劔州有長卿山梓潼江昔秦欲通蜀以五女遺蜀王王遣五丁迎之至梓潼縣大蛇入山穴五丁拔蛇而山摧五丁五女皆壓死因名山曰五婦山馳水所出曰五婦水卽梓潼水也南逕其縣西又南逕鹽泉縣東又東南逕鹽亭縣西又南至射洪縣南入涪

中陰平縣漢白水縣地晉以陰平舊民流寓立北陰平郡及置陰平縣宋因之元魏立龍州及西晉壽郡西魏改郡曰陰平後周徙州於江油郡而改陰平郡曰靜龍隋開皇初郡廢屬始州唐屬劔州

中武連縣漢梓潼縣地後置武功縣及立輔劔郡西魏改郡曰安都縣曰武連隋開皇初郡廢屬始州唐屬劔州有治山小

地三十二

利州路

七 宋刻重修本補

潼水

中下普城縣漢梓潼縣地宋立華陽郡及華陽縣西魏改縣曰黃安郡曰黃原隋開皇初郡廢屬始州唐屬劔州唐末改曰普城有柘溪

中下劔門縣晉桓温平蜀分晉壽置劔開縣孝武帝時省唐聖厯二年分普安永歸陰平三縣地於方期驛置劔門縣屬劔州有大劔山劔門峽劔門關劔閣道晉張載作銘曰一人守嶮萬人趨趨後李特入蜀至劔閣歎曰劉禪有此山河而面縛於魏豈非庸才邪

中巴州春秋戰國爲巴地秦二漢屬巴郡蜀劉氏分屬巴西郡晉因之晉宋之間爲夷獠所據宋末始於嶺南立歸化郡齊因之梁又立木門郡元魏得其地立巴州及太谷郡後復入梁而太谷廢西魏後周皆立巴州隋開皇初歸化木門二郡並廢屬

巴州大業初州廢置清化郡唐武德元年曰巴州天寶元年曰清化郡蜀王氏孟氏因之今縣五

中下化城縣漢宕渠縣地東漢永元中分置漢昌縣屬巴郡晉屬巴西郡宋立歸化郡魏立太谷郡梁改置梁廣縣後周改縣曰化成隋唐爲巴州盤道鎮本梁置難縣西魏改曰盤道隋唐屬巴州寶應元年省入恩陽長慶中復置 皇朝乾隆四年省入清化清化鎮本梁置伏疆縣及立木門郡隋開皇七年改縣爲清化屬巴州唐武德元年置靜州六年州徙治地平縣正觀十七年來屬 皇朝咸平二年屬集州熙寧五年州廢省入化城有化城山巴江

上難江縣漢葭萌縣地梁立東梁州後周改爲集州及立平桑郡及置難江縣隋開皇初郡廢大業初州廢屬漢川郡唐武德元年立集州天寶元年曰符陽郡 皇朝熙寧五年州

地三十二

利州路

八 宋刻重修本補

廢來屬有小巴山難山

中下恩陽縣東漢漢昌縣地梁置義陽縣隋屬巴州開皇末改曰恩陽唐正觀十七年省萬歲通天元年復置二蜀因之七盤鎮本七盤縣唐久視元年置屬巴州 皇朝熙寧二年省入恩陽有義陽山清水

下曾口縣東漢漢昌縣地梁置曾口縣隋唐屬巴州故歸仁縣本宋置平州縣屬巴西郡梁因之後周改曰同昌隋開皇中改曰歸仁及唐皆屬巴州 皇朝乾隆四年省入曾口其章鎮本梁置其章縣隋唐屬巴州 皇朝熙寧五年省入曾口有奇章山北水曾口谷

下通江縣東漢宣漢縣地元魏置諾水縣後省唐武德元年分歸化復置屬萬州七年省八年分始寧復置及立壁州天寶元年改諾水爲通江 皇朝熙寧五年州廢來屬廣納鎮

本廣納縣唐武德三年析始寧歸化置屬壁州寶曆元年省
大中初復蜀省爲鎮故白石縣元魏置隋屬巴州唐武德元
年屬集州八年屬壁州故符陽縣元魏置隋屬巴州唐武德
元年屬集州八年屬壁州 皇朝熙寧五年皆省入通江
有東巴山諾水

中下文州春秋戰國及秦爲氏羌地漢屬廣漢郡東漢安帝以
爲屬國都尉別領三城曰陰平道曰甸氏道曰剛氏道晉泰始
中立陰平郡永嘉末爲仇池楊茂搜所陷累世據有不能克復
至西魏平氏羌乃立文州及盧化郡後周因之隋開皇初郡廢
大業初州廢屬武都郡義寧二年立陰平郡唐武德元年曰文
州天寶元年曰陰平郡蜀王氏孟氏因之今縣一

中下曲水縣漢陰平道屬廣漢郡東漢爲屬國都尉晉立陰平
郡後沒於氏至西魏平之乃置曲水縣屬文州唐初以曲水

地三十二

利州路

九

宋刻重修本補

爲州治故長松縣本建昌西魏置及立文州盧化郡隋開皇
初郡廢十八年改建昌縣曰長松大業初州廢唐正觀元年
縣省入曲水方維鎮後周曰泰興縣立建陽郡隋開皇初郡
廢改縣爲方維屬龍州唐武德四年屬沙州正觀元年省入
景谷後景谷省來屬有太白山東維水

下興州春秋戰國及秦爲白馬氏之東境二漢晉屬武都郡永
嘉末爲楊茂搜所陷元魏得其地立東益州梁立武興蕃王國
西魏改曰興州及立順政郡後周因之隋開皇初郡廢大業初
州廢爲順政郡唐武德元年曰興州天寶元年曰順政郡蜀王
氏孟氏因之今縣二

中順政縣本沮縣地二漢晉屬武都郡元魏改曰略陽梁立武
興蕃王國以處氏西魏立順政郡隋開皇十八年改縣曰順
政唐因之有武興山嘉陵江沮水丙水水出丙穴穴口廣五

六尺去平地七八尺泉源垂注有嘉魚常以三月出自穴下透入水穴口向丙故曰丙穴其水東流注褒水故左思蜀都賦稱嘉魚出於丙穴也

中下長舉縣漢沮縣地西魏置及立槃頭郡後周郡廢隋屬順政郡唐屬興州故鳴水縣本落叢西魏置及立落叢郡隋開皇初郡廢六年縣改爲廚北八年改曰鳴水唐長慶元年省入焉有廚山青泥嶺嘉陵江鳳溪溪水上承濁水中有二石雙高其形若鬪漢世有鳳凰止此謂之鳳凰臺

下蓬州春秋戰國爲巴地秦及二漢屬巴郡蜀分屬巴西郡晉宋以後因之後屬歸化郡梁立伏虞郡後周立蓬州隋開皇初郡廢大業初州廢屬清化郡唐武德七年立蓬州天寶元年曰咸安郡至德二載改曰蓬山郡後復故名蜀王氏孟氏皆因之今縣四

地三十二

利州路

十宋刻重修本補

中蓬池縣漢閬中縣地梁置大寅縣屬隆城郡隋屬巴西郡唐武德七年來屬開元二十九年爲州治唐武德元年改爲蓬池有龍章山蓬水

中儀隴縣梁置及立隆城郡隋開皇初郡廢屬隆州唐武德元年來屬三年立方州八年州廢來屬有儀隴山流江

中營山縣本卽池唐武德四年析相如置屬果州寶應元年來屬寶麻元年省開成二年復 皇朝大中祥符五年更名蓬山鎮本梁綏安縣隋屬渠州開皇末改爲咸安唐武德元年來屬至德二載更名 皇朝熙寧三年省入

中下伏虞縣本宣漢梁置及立伏虞郡隋開皇初郡廢屬巴州十八年更名唐武德元年來屬故宕渠縣梁置及立境陽郡隋開皇初郡廢屬渠州唐武德元年來屬寶麻元年省入蓬山大中中復置 皇朝乾德三年省入良山良山鎮本安

固縣梁置後周立蓬州隋太業初州廢屬清化郡唐武德元年立蓬州開元二十九年州徙大寅天寶元年更名良山寶曆元年省入蓬池大中中復置 皇朝熙寧五年省入

下龍州春秋及秦爲氐羌地漢屬廣漢郡晉屬陰平郡元魏立江油郡後有楊李二姓大豪分據其地西魏平蜀立龍州後周因之隋開皇初郡廢大業初州廢立平武郡義寧二年曰西龍門郡唐正觀元年曰龍門州初爲羈縻屬茂州垂拱中爲正州天寶元年曰江油郡至德二載曰應靈郡乾元元年曰龍州後復曰江油郡蜀王氏孟氏因之今縣三

中江油縣漢剛氏道地屬廣漢郡後置江油縣魏鄧艾伐蜀自陰平景谷步道垂兵束馬魚貫而進逕江油出緜竹卽此地也元魏曰江油郡西魏曰龍州隋曰平武郡唐曰龍州故平武縣梁末氏豪李文智自立爲藩王西魏廢爲縣隋屬平武郡唐正觀八年省入焉有石門山涪江

地三十二

利州路

十一 宋刻重修本補

中三泉縣春秋戰國爲蜀地秦屬蜀郡二漢屬廣漢郡蜀屬梓潼郡晉末屬晉壽郡宋齊梁西魏後周皆因之隋屬利州唐武

德四年析縣谷置三泉縣以縣立南安州并置嘉牟縣八年州廢省嘉牟以三泉屬利州天寶元年屬梁州 皇朝乾德三年以縣直隸京師至道二年升大安軍以興元府西縣屬焉三年軍廢復爲縣而西縣還故屬領鎮二

金牛鎮本金牛縣唐武德三年析縣谷置屬褒州八年屬梁州寶曆元年省入西縣後來屬有嶓冢山漾水發源於此而東流爲漢有嘉陵江

青烏鎮

利州路化外州

下扶州春秋戰國及秦皆爲氐羌地二漢屬廣漢郡後爲吐谷
渾所據西魏逐吐谷渾立鄧州及鄧寧郡後周因之隋開皇初
郡廢七年改曰扶州大業初州廢爲同昌郡唐武德元年曰扶
州天寶元年曰同昌郡乾元後沒吐蕃大中二年節度使鄭涯
收復統縣四

中下同昌縣西魏置屬鄧寧郡隋爲同昌郡唐爲扶州有鄧至
山俗云鄧艾所至故名焉

中下帖夷縣西魏置及立昌寧郡隋開皇三年郡廢屬扶州唐
萬歲通天二年改曰武進神龍元年復故

中下萬全縣本尙安西魏置及立鄧寧郡以平定鄧至羌爲名
隋曰扶州唐徙州治同昌而萬全屬焉至德二年更名有黑
水東南流入白水

地三十二

利州路化外州

十二

宋刻重修本補

中下鉗川縣漢甸氏道地西魏置鉗川縣屬鄧寧郡隋屬同昌
郡唐屬扶州有鉗川山白水

輿地廣記卷第三十二